

REGLUGERÐ

fyrir Íslenskar Getraunir.

1. gr.

Íslenskar Getraunir eru félag, sem stofnað er til að afla fjár til stuðnings íþróttaiðkunum á vegum áhugamanna um íþróttir á Íslandi í félögum innan Ungmennafélags Íslands og Íþróttasambands Íslands.

Heimili félagsins, aðalskrifstofa og varnarþing er í Reykjavík.

2. gr.

Menntamálaráðuneytið skipar stjórn Íslenskra Getrauna. Stjórnin er skipuð fimm mönnum, einum fulltrúa tilnefndum af eftirtöldum aðilum:

Íþróttanefnd ríkisins.

Stjórn Ungmennafélags Íslands (U. M. F. Í.).

Framkvæmdastjórn Íþróttasambands Íslands (Í. S. Í.).

Stjórn Knattspyrnusambands Íslands (K. S. Í.).

Framkvæmdastjórn Íþróttabandalags Reykjavíkur (Í. B. R.).

Varamenn skulu skipaðir á sama hátt. Stjórnin kys sér sjálf formann og skiptir að öðru leyti með sér verkum.

Starfstími stjórnarmanna og varamanna er þrjú ár. Fulltrúi Íþróttanefndar ríkisins kveður stjórnina til fyrsta fundar.

Þóknun stjórnarmanna ákveður menntamálaráðuneytið og greiðist hún af Íslenskum Getraunum.

3. gr.

Stjórn Íslenskra Getrauna fer með yfirstjórn félagsins og hefur á hendi reikningshald þess eða felur það framkvæmdastjóra. Stjórn Íslenskra Getrauna ræður framkvæmdastjóra og annað starfsfólk og setur því erindisbréf. Stjórnin skal færa ákvarðanir, er félagið varðar, inn í gerðabók.

4. gr.

Reikningsár Íslenskra Getrauna er frá 1. júlí til 30. júní.

Reikningar félagsins skulu endurskoðaðir af Ríkisendurskoðuninni. Ársreikning, ásamt ársskýrslu, skal senda dómsmálaráðuneytinu og menntamálaráðuneytinu.

5. gr.

Í októbermánuði ár hvert skal stjórnin boða til fundar, þar sem hún skýrir frá rekstri og hag félagsins fyrir reikningsárið næsta á undan.

Rétt til setu á fundi þessum hafa, auk stjórnar og framkvæmdastjóra Íslenskra Getrauna, formenn, eða varamenn þeirra, Íþróttanefndar ríkisins, Ungmennafélags Íslands, Íþróttasambands Íslands, Knattspyrnusambands Íslands og Íþróttabandalags Reykjavíkur. Einnig skal eftirlitsmaður, sbr. 14. gr., hafa rétt til að sitja fundinn.

6. gr.

Íslenskar Getraunir starfrækja getraunir, en með getraunum er átt við, að á þar til gerða miða — getraunaseðla —, sem félagið eitt hefur rétt til þess að gefa út og selja, eru merkt úrslit kappleikja (íþróttageitraunir).

7. gr.

Stjórn Íslenskra Getrauna ákveður fjölda getraunavikna (leikvikna). Getraunavika telst frá laugardegi til föstudags.

8. gr.

Getraunin miðar að því að geta rétt til um úrslit í 12 kappleikjum, sem á getraunaseðli vikunnar eru, og skal tilgátan kveða á um sigur annars hvors liðsins, eða jafntefli þeirra. Getraunin er því aðeins gild, að notaður sé prentaður getraunaseðill, sem gefinn er út af Íslenskum Getraunum og gildir fyrir hlutaðeigandi getraunaviku, sbr. þó 8. málsg. 11. gr.

Á seðilinn er prentað númer getraunavikunnar og hvenær viðkomandi leikir fara fram. Getraunaseðlar í hverri leikviku skulu tölusettir þannig, að engir tveir seðlar beri sama númer. Vinstra megin á seðilinn eru prentaðir 12 knattspyrnuleikir, en hægra megin einn til átta tölusettir aðaldálkar, sem hver um sig er þrískiptur. Í hverjum aðaldálki bera undirdálkarnir yfirskriftina 1, X og 2, talið frá vinstri.

Hver getraunaseðill skiptist í tvo hluta, hluta 1 og stofn. Við útfyllingu hluta 1 verður stofninn afrit af útfyllingunni. Hluti 1 er sá hluti getraunaseðilsins, sem sker úr um, hvers getið er, sé ekki getið eins á báðum hlutum getraunaseðilsins. Hluti 1 er vinnuseðill Íslenskra Getrauna. Stofninn varðveitir þátttakandi. Á hluta 1 skal skrifa greinilega nafn og heimilisfang þátttakanda.

9. gr.

Við getraunina eru notuð merkin 1, X og 2.

Merkin eru notuð eins og hér segir: Sigur þess félags, sem fyrr er nefnt, skal merkja með því að skrifa töluna 1 í þann reit, sem hefur yfirskriftina 1, jafntefli skal merkja með því að setja X í þann reit, sem hefur yfirskriftina X og sigur þess félags, sem síðar er nefnt, skal merkja með því að skrifa töluna 2 í þann reit, sem hefur yfirskriftina 2. Báða hluta seðilsins skal fylla út eins, og skal seðillinn greinilega útfylltur.

10. gr.

Stjórn Íslenskra Getrauna ákveður, hverjum veitist söluumboð og kveður á um sölulaun.

Ungmenna- og íþróttafélög eða samtök þeirra skulu ganga fyrir um veitingu söluumboða innan íþróttahéraðs síns. Gerður skal samningur við handhafa söluumboðs.

Dreifing getraunaseðlanna skal fyrst og fremst falin hinum ýmsu ungmenna- og íþróttafélögum í landinu og samtökum þeirra.

Greiða skal stjórn héraðssambands 3% af heildarsölu í viðkomandi íþróttahéraði, enda staðfesti hún félagslega aðild umboðsaðila að samtökum sínum í íþróttahéraðinu.

Þau félög eða félagasamtök, sem taka að sér umboð fyrir Íslenskar Getraunir, skulu senda uppgjör til aðalskrifstofu félagsins og skulu þau hafa borist eigi síðar en kl. 12 á hádegis laugardaginn í upphafi leikviku.

Umboðsmaður skal afhenda eða senda félaginu seðilhluta 1. Við getraun gilda einungis þeir seðlar, sem berast aðalskrifstofu félagsins áður en nokkur leikjanna á getraunaseðlinum hefst, í síðasta lagi þó fyrir kl. 12 á hádegis laugardaginn í upphafi leikviku. Skal þá ljósmynda hluta 1 af seðlinum og skal myndin berast eftirlitsmanni áður en leikjunum á seðlinum er lokið.

11. gr.

Getraunaseðlar skiptast í tvo flokka eftir útfærslugerðum: Einfaldar raðir og margföldunarkerfi.

Á getraunaseðli, sem gerður er fyrir einfaldar raðir, eru tveir til átta aðaldálkar, sbr. 8. gr. Er þá aðeins heimilt að setja eitt merki við hvern kappleik í hvern aðaldálk. Séu merkin fleiri, skulu þeir leikir í þeim aðaldálkum, þar sem fleiri en eitt

merki er skráð við, ekki taldir með. Sé getraunamerki sett í rangan reit, sker reiturinn úr um hvers getið er en ekki merkið.

Á getraunaseðli, sem gerður er fyrir margföldunarkerfi er prentaður einn aðal-dálkur og hefur hann yfirskriftina K. Er þá heimilt í samræmi við textann á seðlinum að setja eitt eða tvö aukamerki við tiltekinn fjölda leikja. Séu aukamerkin fleiri og seðillinn því með fleiri röðum en seðillinn er ætlaður fyrir, er seðillinn ógildur. Séu merkin færri en tilgreint er á seðlinum, er seðillinn gildur og reiknast með þeim raðafjölda, sem á seðlinum eru. Raðafjöldinn fæst með því að margfalda saman merkjafjöldann við þá leiki, sem bera fleiri en eitt merki. Leikur með tveimur merkjum er sagður vera tvítryggður og leikur með þremur merkjum er sagður þrítryggður. Kerfi með tveimur tvítryggingum og einni þrítryggingu er þannig $2 \times 2 \times 3 : 12$ raðir.

Íslenskum Getraunum er ekki heimilt að gefa út getraunaseðla með fleiri en 144 röðum í margföldunarkerfi.

Útfylling getraunaseðils er algerlega á ábyrgð þátttakanda. Eftir að getraunaseðill hefur borist Íslenskum Getraunum, er hann eign félagsins og verður hann ekki afhentur eða lánaður þátttakanda til breytinga eða leiðréttinga.

Nú glatast seðill, sem afhentur hefur verið umboðsmanni ungmenna- eða íþróttafélags, svo sem vegna bruna, innbrota, samgöngutruflana eða af öðrum ástæðum, og á þá þátttakandi aðeins rétt á að fá þáttökugjaldið endurgreitt í formi nýs seðils.

Nú eyðileggst getraunaseðill, sem borist hefur í tæka tíð til félagsins, í bruna eða af einhverjum öðrum sambærilegum orsökum, sem ekki er hægt að saka félagið eða starfsmenn þess um og á eigandi seðilsins þá aðeins rétt á að fá andvirði seðilsins endurgreitt.

Íslenskar Getraunir bera ekki ábyrgð á tjóni, sem ungmenna- eða íþróttafélög eða umboðsmenn þeirra kunna að valda þátttakanda með rangri meðferð getraunaseðils seinlæti í afgreiðslu vikuuppgjörs eða af öðrum orsökum. Seðlar, sem berast of seint einhverra orsaka vegna, skulu gilda í þeirri getraunavíku, er þeir berast til Íslenskra getrauna, ef þeir berast fyrir lok sama starfstímabils.

Hver þátttakandi ber sjálfur það tap, sem orsakast kann af því, að hann hefur ekki fylgt ákvæðum í reglugerð þessari varðandi útfyllingu, meðferð og afhendingu getraunaseðils hans.

12. gr.

Nú falla einn eða fleiri kappleikir, sem á getraunaseðlinum eru, niður og skal þá eftirlitsmaður varpa hlutkesti um úrslitin í þeim leik eða leikjum. Nota skal tölflötung með hlutfalli milli merkjanna 1, X og 2 : 5 — 4 — 3 í sömu röð. Gildir það merki sem upp kemur, fyrir hvern leik. Skal leit að vinningsseðlum ekki hafin, fyrr en að þessu loknu.

Ákvæði 1. mgr. gildir þó ekki um leiki, sem færðir eru frá laugardegi til sunnudags. Er leikur er hafinn og honum hætt vegna óveðurs, þoku eða annarra óviðráðanlegra orsaka þá gildir það sem úrslit, hvernig leikar standa, er leiknum var hætt. Þótt íþróttasamtök leiðrétti úrslit leiks eftir kæru, hefur það engin áhrif á getraunina.

Sé leikur framlengdur vegna jafnteflis eftir fullan leiktíma gildir niðurstaðan að lokinni framlengingu.

13. gr.

Verð hverrar getraunaraðar er kr. 1.00 — ein króna —.

Helmingi af heildarsöluverði raða eða miða skal varið til vinninga.

Heildarupphæð vinninga skiptist í 2 hluta og skiptast 70% hennar milli þeirra seðla, sem flestar réttar ágiskanir hafa, en 30% heildarvinningsupphæðarinnar skiptast milli þeirra seðla, sem næstflestar réttar ágiskanir hafa.

Sé einn seðill með flestar réttar ágiskanir, rennur öll upphæðin í 1. vinningsflokki til hans, en séu fleiri seðlar með flestar réttar ágiskanir, skiptist vinningsupphæðin í 1. vinningsflokki jafnt á milli þeirra. Allir vinningshlutar í 1. flokki lækka þannig, að þeir standi á kr. 5.00 eða kr. 10.00. Mismunurinn rennur í varasjóð.

Í 2. vinningsflokki skiptist vinningsupphæðin jafnt á milli þeirra, sem næst flestar réttar ágiskanir hafa. Verði vinningshluti í 2. vinningsflokki hærri en vinningshluti í 1. flokki, skulu vinningsflokkarnir sameinaðir og vinningshlutar vera jafnháir. Allir vinningshlutar í 2. vinningsflokki skulu lækka þannig að þeir standi á heilli krónu. Mismunurinn rennur í varasjóð.

Vinningar, sem ekki ná kr. 50.00, skulu ekki greiddir út. Ef vinningshlutar í 2. flokki ná ekki kr. 50.00, bætist vinningsfjárhæð 2. flokks við vinningsfjárhæð 1. flokks og skiptist heildarvinningsupphæð vikunnar þá milli seðla í 1. vinningsflokki. Nú nær vinningshluti í 1. flokki ekki kr. 50.00 og fellur þá greiðsla vinninga í þeirri viku niður, en vinningsupphæðinni skal þá bætt við heildarvinningsupphæð næstu getraunaviku á eftir.

14. gr.

Dómsmálaráðuneytið skipar eftirlitsmann til þriggja ára í senn og skal hann gæta hagsmuna þátttakenda. Eftirlitsmanni skal heimilt að ráða starfsfólk til aðstoðar við eftirlitsstörf. Dómsmálaráðuneytið skipar einnig varamann eftirlitsmanns. Kostnaður við eftirlitið greiðist af Íslenskum Getraunum samkvæmt ákvörðun dómsmálaráðuneytisins.

Hlutverk eftirlitsmanns er:

1. Að varðveita mynd af hluta 1, en hana skal taka af þeim getraunaseðlum sem berast áður en nokkur leikur í viðkomandi getraunaviku hefst. Eftirlitsmaður skal varðveita myndina þar til kærufrestur er útrunninn.
 2. Að staðfesta vinningaskrá hverju sinni.
 3. Að úrskurða kærur sem berast.
 4. Að hafa eftirlit með að vinningar séu greiddir.
 5. Að varpa hlutkesti um úrslit leiks eða leikja, sem falla niður, shr. 12. gr.
- Eftirlitsmaður skal færa sérstaka gerðabók og skal skrá í hana vinningaskrá hverju sinni, svo og allar kærur og úrskurði.

15. gr.

Íslenskar Getraunir gefa út vinningaskrá fyrir hverja leikviku staðfesta af eftirlitsmanninum. Í vinningaskrá, sem birta skal í dagblöðum, eru númer þeirra getraunaseðla, sem hlotið hafa vinning.

Heildarupphæð vinninga breytist ekki frá því, sem birt er í vinningaskrá, en einstakir vinningshlutar geta breyst, ef kærur eru teknar til greina.

16. gr.

Telji þátttakandi, að númer á getraunaseðli hans sé ekki birt í vinningaskrá, verður hann sjálfur að leggja fram kæru til að fá leiðréttingu. Kæran skal vera skrifleg á þar til gerðu eyðublaði. Eyðublöð fást hjá umboðsmönnum Íslenskra Getrauna og á aðalskrifstofunni. Kæru skal senda til aðalskrifstofu Íslenskra Getrauna og skulu hafa borist þangað fyrir kl. 12 á hádegis á 21. degi frá dagsetningu vinningaskrárinnar. Kærufrests skal getið í vinningaskrá. Kæru, sem berast of seint, eða veita ekki fullnægjandi upplýsingar til kæruúrskurðar, er ekki skylt að taka til greina.

Eftirlitsmaður kveður upp fullnaðarúrskurð um kærur og tilkynnir kæranda um úrskurð sinn. Til grundvallar úrskurði skal leggja það, sem skráð er á seðilhluta 1.

17. gr.

Að kærufresti liðnum skal greiða vinninga getraunavikunnar. Sé nafn og/eða heimilisfang eiganda getraunaseðils ekki skráð á hluta 1 á getraunaseðli eða ógreinilega skráð, þá telst seðillinn nafnlaus. Falli vinningur á nafnlausan seðil, skal eigandi hans framvísa seðlinum við aðalskrifstofu Íslenskra Getrauna, eða við þá peningastofnun, sem annast greiðslur vinninga fyrir félagið. Vinningar skulu greiddir með ávísunum til þátttakenda. Fáí vinningshafi ekki vinning sinn greiddan, skal hann tilkynna aðalskrifstofu það, og skal tilkynningin hafa borist þangað innan þriggja mánaða frá dagsetningu vinningaskrár.

18. gr.

Í lok hvers reikningsárs skal birta í Lögbirtingablaði númer þeirra getraunaseðla, sem vinningar hafa fallið á, og eru þá ósóttir. Verði vinninga eigi vitjað samkvæmt þeirri auglýsingu innan mánaðar frá því að hún birtist, falla vinningarnir í varasjóð.

19. gr.

Vinningar getrauna eru undanþegnir hvers konar opinberum gjöldum, öðrum en eignaskatti, á því ári sem þeir falla til útborgunar.

20. gr.

Til kostnaðar við íþróttagetraunir telst greiðsla til Knattspyrnusambands Íslands (K. S. Í.) að lágmarki kr. 2 500.00, en kr. 150.00 af hverjum kr. 10 000.00 heildartekna yfir kr. 200 000.00 allt að því að greiðslan nemur kr. 4 750.00 á ári, en eftir að þeirri fjárhæð er náð greiðast til K. S. Í. kr. 75.00 af hverjum kr. 10 000.00.

Einnig telst til kostnaðar 0.5% greiðsla af heildarsölu í varasjóð, sem Íslenskar Getraunir eiga að nota til þess að mæta áföllum, sem félagið kann að verða fyrir.

21. gr.

Þegar greiddir hafa verið vinningar, sölulaun og kostnaður, skal ágóða af rekstri Íslenskra Getrauna skipt sem hér segir:

Til Íþróttasjóðs 10%.

Til Ungmennafélags Íslands 20%.

Til Íþróttasambands Íslands 70%.

22. gr.

Öllum öðrum en Íslenskum Getraunum skal óheimilt að starfrækja getraunir, sem um ræðir í 2. gr. laga nr. 59 29. maí 1972 um getraunir. Enn fremur er óheimilt, án sérstakrar lagaheimildar, að starfrækja veðmalastarfsemi í sambandi við íþróttakeppni. Brot á þessum ákvæðum varða sektum allt að kr. 1 000.00, sem greiðist í Íþróttasjóð.

23. gr.

Leggist starfræksla Íslenskra Getrauna niður, skulu eignir félagsins varðveitast hjá Íþróttanefnd ríkisins.

24. gr.

Reglugerð þessi, sem sett er samkvæmt heimild í lögum nr. 59 29. maí 1972 um getraunir öðlast gildi 20. ágúst 1981. Jafnframt fellur úr gildi reglugerð nr. 348 21. desember 1972 um Íslenskar Getraunir, sbr. reglugerð nr. 138 20. maí 1974.

Dóms- og kirkjumálaráðuneytið, 13. ágúst 1981.

Friðjón Þórðarson.

Ólafur W. Stefánsson.